

玉鑑堂詩集

玉鑑堂詩集卷三

烏程汪日楨著

同邑後學劉承幹編次

貽孫愈愚

燮

修竹翳檀欒清溪圍淥瀆中有數畝宮脩然謝塵鞅浮  
雲軒冕輕霽月胸懷朗文章力起衰直與韓柳仿經史  
入鎔鑄波瀾乃寬廣平易無艱詞唱歎有餘響但見溢  
清光語淡神蕭爽豈知下筆先覃思探象罔十年同里  
閨一面疏還往獨有瓊琚辭擊節供欣賞登堂已恨晚  
久切山斗仰論文析疑義所得非意想鴻篇豈苟作要  
令百世放名山可問途我欲騰而上

次韻答愈愚

愧我才偏薄詩人強自名惟君情獨契有眼月同明  
刻鵠期他日雕蟲悔此生文章根德義更勵歲寒盟

次韻答秋憶坐雨見懷三首

索居苦岑寂雲煙作供養別君幾何時草木日夜長  
入夏多淫霖占月輒瓦仰庭柯無鳥鳴砌草有蛙響  
忽傳新咏來颯颯天籟爽空齋條如秋涼意在虛幌  
微言粲珠玉蕪語翦榛莽何啻一室中奇文共欣賞  
知君軼塵才迴作復古想求友情殷拳憤世意慨慷  
只應吾與君交誼今猶曩相思迹雖睽相印心無兩

我居南林聚老屋荒江濱友朋諒我嬾揖讓無煩文  
隨巢老居士

謂鐫范

胸襟滌纖塵史筆溯漢晉經籍探周殷

疑義共商權契合眞如神道同志無戾追逐龍與雲學  
業互砥礪如德必有鄰此意亦良厚我生非不辰遠期  
千載後幸勿歸沈淪所嗟天一涯素心猶有人一身集  
三益直諒兼多聞黃鵠有遠志不與雁鶩羣放言多高  
致難共世俗論何當列鼎足形影相與親古風或可作  
薄俗須君敦

規過賴良友非友過愈滋柰何勢利交不值金一鎰游  
戲日微逐衣冠競時宜知我意難合牽率幸可辭嗟彼  
入迷途一去無還時豈無款曲談責諛無乃疲豈無勉  
勗語取善何所資空存矯俗願問子將安施捫心守愚  
拙涉世從嘲嗤晚成有大器所利非繭絲畱畱在經訓

所用非鉉錡爲學貴心得慎勿求世知尺書可還往相  
友兼相師

舟行遇雨

陰晴變俄頃震地走驚霆雲擁千重黑天留一半青小  
舟依鷺宿急雨帶龍腥禾稻方愁潦窮途況我經

送趙積仲歸上海

兩載蕭齋快盍簪那教歸夢憶江南目窮古篆參蟲鳥  
心入叢編化蝨蟬安邑竟難留閔貢渭城可柰唱何戡  
深宵莫遣嚴更促煮茗聊爲徹夜談

判袂依依感不禁贈言幾度費沈吟便誚題柱平生志  
莫改耽書舊日心此後相思惟夢去每當欲別轉情深

江鄉臘盡梅須放還擬同君踏雪尋

銅士書來詢近況予答書引東坡遷居臨臯亭詩  
劍米有危炊針氈無穩坐之句蓋有所感也銅  
士因用東坡韻作詩寄示次韻答之

仲卿困牛衣文休給馬磨固窮士有常枉道計乃左家  
有十畝田幸免於陵餓好學或拜經虛名莫驚坐豪華  
如一夢回首煙雲過空懷貨殖篇種竹千萬个局促負  
壯懷轅駒犗鈴馱朝來讀新咏愁城爲君破緬彼羊舌  
賢憂貧眞可賀牽俗德恐蕪吾師在楚些

前詩意有未盡再作一首

人生陳迹循團團牛轉磨愚憊本天性動覺與時左故

人百里外工詩守寒餓助我先德承尺書飛入坐志大  
才轉疏廢學乃吾過敢望駟馬門廣可容局个便欲租  
蹇驢詩思灞陵馱來詩勸以韻語自遣佗僚雖無聊歡顏可時破  
未擬追顏原且須躡郊賀古人不我弃一唱巫陽些

戲咏壁者

蹢躅如此劇艱辛顛躓頻遭遇太屯始信世途平亦險  
誰知物理屈猶伸推心未遇趙公子掩口難禁齊婦人  
安步尙憂蹉跌易前車有鑒善持身

白蘋洲懷柳文暢

一泓碧水涵青蘋汀洲當日留詩人洞庭歸棹瀟湘客  
愛此江南日暮春五字新咏劇清婉千載流傳猶繾綣

紅帶飛來水欲波蒼茫夕照前溪晚鴉軋聲催發棹謳  
水花風葉一江秋白蘋香斷西風起臘有平波渺渺流  
昇山懷王逸少

青山一角如玦環松杉落落蒼苔斑一從佳客此登眺  
遂使名滿東南閒巖扃幽寂忘機地落日低徊動吟思  
卻憶山陰道士居清遊同此留連意晉代風流歲幾更  
一邱一壑總關情不知古嶺幽篁籟何似蘭亭絲竹清  
三癸亭懷古

路入煙霞嶺亭留翰墨場賢猶思刺史義獨取昭陽遺  
迹餘唐代名山溯夏王榜應修月斧址恰倚雲岡憶昔  
平原相來游極樂鄉班春熊軾至錫瑞隼旗揚韻海成



新稿書巖發舊藏文如探宛委體更異凡將屬草編難  
定生花管正忙西園邀伴侶東閣聚篇章疑入芝蘭室  
初營薜荔房深山勞相度好景可徜徉合作聽鶻館殊  
非射鴨堂回環圍螭壁璀璨駕虹梁時喜千支會名垂  
歲月長拈毫書大字懸額在中央山氣三秋爽嵐光六  
月涼圖經鐫石柱卷帙頓書倉窗列東西檻人來上下  
牀曲欄藤引蔓小院竹飄香妙詠南樓月清談北海觴  
鴻文傳藝苑麗藻入詩囊研削時光久搜羅掌故詳編  
書纔此地游宦又他方封邑尊東魯行人悵北邙庭荒  
衰草白簷破夕陽黃忠節空彪炳遺編亦渺茫伊誰尋  
古碣更爲詠甘棠露冷蛩螢咽風微蝙蝠翔杼山憑弔

處極目感滄桑

天目山

雙瞳皎皎不在天天目乃在茲山巔兩池左右夾明鏡  
炯如日月雙丸懸高高三萬六千尺幸有梯棧相鈎連  
羣峰縱橫不可數奔騰起伏龍蜿蜒或如神鼇忽潛伏  
或如靈鷲方高竊或如太華巨靈擘或如王屋夸娥遷  
或如仄徑垂一縷絕頂上作螺髻旋或如掘井深九仞  
陰洞下有蛟龍淵其中一峰挺且秀蓮花鑱削藤蘿纏  
名藍隨處可棲隱石筍卓立清泉濺但見雲氣在山半  
不知雷鼓聲喧闐盤渦轉轂上高頂兩泓終古清臚圓  
珠宮貝闕疑可覩元華蒼草何芊緜白衣山人招我往

通眉長爪將無仙我欲從之梯磴絕浩歌金石寰空塞  
何當百斛醉春酒煙霞永結山靈緣蒼然長嘯萬山響  
舉手更拍洪崖肩乘風徑欲到閩苑相逢一笑三千年

葉少蘊石林園

疊嶂橫蒼弁清池映碧琳名園前代迹片石古人心突  
兀青厓峙嵯峨綠蘚侵地偏岡起伏巖古徑幽森勝事  
今何在高情夙所欽詞人曾久住此地發清吟明月瓊  
瑤路春風翡翠岑有時攜蠟屐當日佩朝簪階秩登祠  
部聲華重翰林防江垂鉅績領郡矢清箴武衛龍韜壯  
軍籌虎帳深團兵威獨奮轉餉力能任神武冠初挂茗  
溪路可尋官非持節使家有買山金卜築三椽屋言歸

一水溥雲根圍峭拔瑤筍列崎崑力士開偏速夸娥負  
莫禁鐫劉疑斧鑿搜剔等璆琛精舍留真意新居愜素  
襟兼山收麗景承詔仰綸音放論宜巖下清游喜竹陰  
躋雲瞻勝概愛日見忠忱界啟清虛府泉鳴太古琴米  
顛原石癖皇甫亦書淫讀易占凶吉搜聞記古今春秋  
推甲子謨誥辨辛壬玉澗書纔續金樽酒屢斟螺髻工  
位置鳩杖好登臨古嶺煙嵐合寒林夕照沈巖阿終寂  
寂歲月已駸駸勝地棲狐鼠遺編付蠹蟬層巒凝黛點  
峭石銳霜鐔老鵲巢庭樹羣麋覓野苓階欹藤繞蔓徑  
仄棘抽鍼破屋秋風圯空山夜雨淋巖尋羅漢舊訪古  
思惓惓

以上戊戌年  
至癸卯詩

能無

能無三宿戀此是百年居棄擲摧燒後辛勤締造初光  
陰原過客天地亦蘧廬安宅期無曠修仁企子與

讀史

虛聞左手執干戈幾見卷阿有遂歌涑水徒勞爭夏竦  
漢廷羣擬代蕭何備員娓娓譏非過伴食容容福轉多  
不信大名須大行元公諡法定傳訛

讀漢書雜詩十首

紛紛巫蠱獄繁滋帝意先懷詛上疑特詔祠官除秘祝  
孝文明聖竟前知

誰道能居一障閒辯窮方悔忤權奸斷頭何必匈奴使

疑案千秋是狄山

計較錙銖駟僉徒輕財翻遜牧羊奴樸忠久已邀宸鑒  
何不從烹桑大夫

多事平津禁挾弓銷兵愚與始皇同卯金不蹈亡秦轍  
全仗吾邱一議功

叩頭流血尙生瞋丞相威能困弄臣傳與後王應踵武  
法堯禪舜又何人

昔日隨輿且莫云平陽更降大將軍輸他太主歸堂邑  
會葬翻教共董君

弗鬱魚龍瓠子河宣房未塞起悲歌增卑培薄多勞費  
治水從來下策多

敬父如何反議刑當車數語願垂聽信知儒術西京盛  
門卒陳詞亦引經

安世由來學術奇亡書三篋誦無遺驚心洪範論皇極  
厥罰常陰竟未知

三古遺經久不磨專家詰訓莫輕訶伏戎新莽誣妖讖  
持較茲茲誤孰多

讀潘安仁哀永逝文志感

根觸殘編讀淋漓淚幾行惟君眞語妙令我亦神傷生  
覺歡顏少悲偏逝日長鼓盆如可遣吾欲問蒙莊  
淚與聲俱下因之感慨新浮生原夢幻愁緒忽紛綸息  
謗期無辯懷憂患有身翻教羨桑戶而已反其眞

五人墓

厥公有旨誰敢沮緹騎傳呼逮吏部吏部未逮五人怒  
此輩須擊殺庶令閹黨懼吏部既逮五人死恨不誅逆  
閹束身見天子千秋論定洵無誤富貴須臾草頭露不  
信權璫祠今爲五人墓媚璫巡撫勢赫弈馬鬣高封在  
何處巡撫誰毛一鷺

漢承安宮鼎歌

鼎爲溫鍊華

日鑑

所藏銘曰承安宮銅鼎容一升重

十四斤甘露二年安長丞福掾祿守令史宣夕世造  
第五凡三十一字

溫君嗜古信成癖金薤銅花富撰著尊彝臚列摹款識



墳索斟酌爛傳註就中漢鼎尤瑰奇遠壓商鐘及周錄  
字鐫卅一在口側造器之年記甘露西京隸古斯足珍  
拓本流傳等球璐宮名承安文炳然想見簷楹絢丹牘  
書尋白阜有缺略記溯黃圖乃褫誤嘉名丞掾取吉祥  
福祿來同衍休祚令史三人宣夕世藉補官儀證員數  
射斗如瞻紫霄氣容升可斟黃鍾度斤重十四煩討鞏  
次居第五亦詳具初無饕餮偉厥觀不遭回雷玷其素  
匹諸大璞謝雕琢疇信吉金出冶鑄有棱在腹製頗殊  
以鉉貫耳輕可措推詳大小辨鼎鼐爾雅毛詩差足據  
形圖弁上協詰訓名鼎實鼎茲曷故對文則異散則通  
寶器洵爲攷古助憶當陽武纘大統政嚴綜覈民饒裕

聿聞重器守七鬯誰敢暉臺動覬覦大烹函牛曾養賢  
少汁燂雞當進御尙方薦几承黼黻鼎寶陳筵佐簋簠  
美陽所得寶奇寶梅邑尸臣留記注子高好古識銘勒  
或仿範模俱造作吁嗟史籍久縣奪坐使沈疑終莫悟  
周康祠廢劫灰盡埋沒人閒分朽蠹緘滕一旦歸弃藏  
神鬼千秋應呵護照人古色尙斑駁引我新詩劇飛翥  
苦吟庶免軒轅嗤集古或恐歐陽妒

貽鐵華

珠墳笙典儘研覃著述何心艷笏簪交到忘年如水淡  
書真有味比茶甘說經義勝曾規杜攷古編成不愧郊  
莫訝袁生來往數喜從休槌接清談

卽事

不好初聞告鳩媒病魔愁陣兩堪哀閒情一賦難磨玷  
綺語三生未懺災窈窕本輪中婦艷嬌癡難備下陳材  
前生我是維摩詰空際天花任去來

虎邱謁白公祠次銅士韻

虎阜崔嵬積翠浮唐賢祠宇至今留村翁潔祀桐鄉社  
太守清名鬱石舟酒國詩城羈五馬山光帆影眩雙眸  
祠旁有山光帆影閣登眺頗勝落燈風裏生朝近嘈雜神絃祝麥耶

菱湖舟中敝裘被竊

扁舟夜靜泊荒村爲爾無端警旅魂昔日曾疑肱篋論  
他時應念解衣恩莫嗤閔貢肝同累差幸張儀舌尙存

二語皆有可奈春深寒轉劇篷窗坐擁布衾溫  
感而云

題蔣生沐

光熙

篝燈教讀圖三首

儀表推賢母傳來一幅圖哀絃吟寡鵠編袂泣慈烏萬  
卷遺書在三年宰木枯折蓼勞督課尙憶識之無  
燈影幢幢裏寒窗夜漏深能諳畫荻教無負鑿楹心黯  
澹凝珠穗淒清聽玉槩蓼莪詩可廢血淚定沾襟

年少誇才穎翩翩終賈儔由來顯親志端在立身訓縹  
帙名山富緹油信史留期君三不朽努力紹前修

題鮑聽杏

正言

聽烏圖

城上烏尾畢逋墨痕黯淡聽烏圖愁雲冷月交模糊烏  
夜啼夜向晨淚痕掩抑聽烏人生也不辰嗟鮮民鮑君

鮑君真孝子顏烏名著東陽里傷心早廢蓼莪篇反哺  
私情有如此君不見仰天一呼雙淚垂烏頭變白古有  
之烏頭變白不變孝與慈鮑君鮑君作圖之意將在斯  
吁嗟乎桓山羽翼空悲哽鳩鷹變化真俄頃父母何異  
野人等此圖此意誰能領

題紀孝子峻宿墓圖

一艇傍佳城終身孺慕情但求安素志原不爲浮名獨  
處曾三載長眠共五更披圖溢純孝風化式鄉氓

擬東坡書王定國所藏煙江疊嶂圖用原韻

山中久住不見山舉頭但見浮青煙卻從畫裏見真態  
平波遠合山蒼然不知在山出山清與濁懸崖白瀉珠

簾泉鏘珠濺玉赴谷口隨山曲折歸平川畫師揮灑信  
好手繹思乃在荆關前經營尺幅劇慘淡意匠常到非  
想天明窗淨几一披覽筆鋒直與詩爭妍安得圖中妙  
境在人世卜築便擬歸耕田君不見湧金浮玉好風景  
萍蹤偶住凡幾年至今魂夢尙縈繞溪雲山月空嬋娟  
半弓何日占清曠風晨雨夕聯床眠慕頤泉石更幽邃  
神栖傳有飛空仙誅茅待作比鄰約隱居共結山靈緣  
息壤在彼言不食抽毫進牘定有和我琳琅篇

偶興

白日都亭晚悲風易水秋如何同一劍頃刻變恩讐

奚榆樓

疑

於峴山顯化寺側創立蘇文忠公祠誌

事四首

山鄰學士路縈紆終古溪灣尙姓蘇

學士山蘇灣皆以公得名

青綬

聲名傳北宋碧湖風景冠西吳刊章下郡臺臣捕解厄

修齋野老趨莫道穹碑無墮淚羊公峴首竟何殊

公峴山詩

云我非羊叔子  
媿此峴山亭

側近招提構一椽商量秋菊薦寒泉昔歌太守來何暮

今喜詩翁老更賢主列贈官榮錫命

時議題主予以爲宜稱宋贈太師前

祠部員外郎直史館  
知湖州蘇文忠公

場依選佛好參

禪渾疑白鶴峰前

路卜築新居筮日遷

遺愛流傳萬古長浙江西畔是桐鄉依然蘋藻陳筵潔

記否芙蕖繞郭香

公在湖時有繞城觀荷花詩

對戶遙嵐晴撲翠隔

湖斜照晚浮黃若憑山水論軒輊或恐墓頤遜道場  
吟魂長傍霅溪湄笠屐高風想見之酒醅烏程腰臘祭  
歌繡白紵送迎詞采椽茅屋鳩工易紙閣蘆簾靜坐宜  
祠旁餘屋一間爲讀書習靜之所一樣銅符遺宦蹟伊誰更創九賢祠  
峴山舊有九賢祠公其一也久圯

榆樓又募修峴山明霞墓誌事二首

情癡司李說馮君曾記摩挲斷碣文魂到此山猶墮淚

夢來何處更爲雲

二語卽司李題墓門句

芳鄰長傍鴛鴦塚

墓側爲吳

園次太守葬死央處

幻影空疑蛺蝶裙贏得埋香傳勝蹟峰腰三

尺美人墳

礱石鳩材更築成荒涼墓道半敝傾綺羅早化紅心草



環佩重招白玉京老去詞人猶好事勾留過客也多情  
他年弔古來裙屐記取風流處士名

冬夜讀書感懷

寒雲頽空雪覆屋夜半伊吾出深竹一編古史足低徊  
振觸令人淚盈掬名留竹帛知幾人餘子由來殊碌碌  
如何信史猶傳疑佳傳曾求米千斛首陽東陵同一軌  
大好耕樵伏岩谷嗟予自憐還自笑甕裏醯雞苦局促  
搜尋萬卷時鑽研俯仰千秋得歸宿或乘軒冕榮五鼎  
或處衡茅甘半菽雞口誠知勝牛後鶴脰眞難續鳬足  
季倫豪富阮籍貧士龍善笑唐衢哭一非一是信誰賢  
不惠不夷應我獨讀聖賢書志何事一任涼暄如轉轂

生材自古必有用求賢記否三熏沐金門對策求治安  
玉關殺賊奮馳逐不然便作由東鄰進取羞爲五穀嚮  
鄉閭式化社可祀名山著書史能錄紛紛醉夢彼何人  
奈何我亦塵轡縛蠹蟲食字不成仙鼯鼠飲河徒滿腹  
持躬未解師夸毗知命何煩推珞珞開樽痛飲盡百榼  
拔劍悲歌終一曲寒燈欲燼寒飈鳴黃雞催曉更籌速

題巖子弓妹壻

銑

餐花室詩集

不炫雕蟲巧悠然寫性情人原如菊淡思覺比茶清壯  
氣江山助良材竹箭呈誰云楊汝士能壓樂天名

予旣作前詩子弓意猶未足復成八首

用皇甫持正體

複壁注孟子邠卿有題辭同名乃異實厥體初非詩以

詩代序跋不知昉何時沿俗遂成例貢諛良可嗤贈言  
古有法頌必寓以規譬如躍冶金鍛鍊斯益奇譬如連  
城玉磨琢斯無疵佞臣固已矣諍友夫何疑

君才何卓犖琢句多天成居然先正流其言明且清有  
志在大用霖雨施蒼生由來廊廟器不專以詩鳴下以  
式里俗上以追韶英豈如苦吟人徒作蒼蠅聲竿頭冀  
日進既精益求精他年執牛耳獨主騷壇盟

君從滇南來水程瀘州始沿江放巨艇直送江入海驅  
馬赴燕臺還轅返蒼水統計足所經曲折萬餘里快誦  
紀遊詩山川助奇詭令我成臥遊宛見風物美卓哉真  
我師報之應拜稽吾讀乙部書方將攷地理

稽古虞夏書有曰詩言志大序本宣尼首卽申其義是以古大家所作必有爲或以託懷思或以闡幽邃始知古人詩詩外更有事山水俱模範興地誠宜誌交親感離合譜牒亦可記試讀戰場文精思便能至

操觚莫率爾前哲昔所嗤先學五言製曾未六甲窺自從風騷後歷代多文辭沿流更窮源學貴無常師才力所到處淺深皆有裨蔑古固云妄泥古無乃癡要得古人意勿襲古人詞斯能自運化毫端具鑪錘

有唐韓退之碩學渺無對自云爲時文不免汗浹背有宋陸務觀清才絕流輩自云詩未工猶爲俗人愛論世知其人立志固有在想當下筆時今古盡函蓋好語本

如珠一一洗疵類退哉古之人直可取而代  
漁洋取妙悟竹垞譏空疏要知兩家言一軌非歧趨清  
思是其主挂角羚羊如非詞意莫達乃藉藻采攄帶經  
有遺集此腹非空虛用較曝書亭誰曰難齊驅日驗更  
心得古語良不誣能行萬里路更讀萬卷書

君詩數百首字字皆琅玕奈何勤下問索我題卷端匹  
諸蘇合香奚取蜣螂丸頌規兩無當緘默非所安妄想  
牛蹄涔可益大海濶詩成更自笑曷不先反觀視睫乃  
不見責人斯無難我矛陷我盾此論終須刊

擬東坡墨妙亭詩用原韻二首

穹碑宣聖題延陵後人筆陣多鸞騰漢鑄唐勒相輩出

瑤光一散皆鵬鷹荒陂野草半埋沒土花剝蝕初無棱  
忍將球璧委榛莽斷紋碎纈漸流冰由來寶物不終闕  
搗呵神鬼猶依憑伊誰搜剔徧遺逸臙焦商徵泯愛憎  
紫髯學士本循吏聯鑣五馬輝緹繒風流好事邁前哲  
郡齋卜筮歌陬登明駢輦致盡羅列退衙燕賞招賓朋  
當時弃置誰復道雨淋日炙纏枯藤傳聞索筆識黃絹  
倉卒欲讀嗟無燈他年回首溯陳迹懸知魯郡思張膺  
蒼涼漢寢兼唐陵墨寶氣作虹光騰世閒神物見匪偶  
有時變化同鳩鷹欲題黃絹致嘉歎曠黑意讀手摸棱  
苔埋土蝕任弃置未免斷缺如春冰漂流奕禩幸完好  
鬼神呵護寶式憑紫髯太守信賢傑搜羅殘賸無愛憎

漢碑唐碣聚所好模糊或似無文緒古今寶刻盡球璐  
搜岩剔穴窮攀登牛腰攜束橐駝載著錄繁富誇賓朋  
由來金石證經史要須名論芟葛藤公餘燕坐足吟賞  
鑒別有眼明如燈何當從君十日飲周旋快讀開胸膈

古別曲

津頭別君處種柳今成陰春潮日夜長不及離情深如  
何素心侶忽變白頭吟憶昔留君住月夜花朝等閒度  
一從送君去脂盞香匳間不御君別妾兮山之岑悲風  
瑟瑟愁人心妾送君兮湖之渚逝水茫茫淚如雨相見  
苦難別苦易旦暮思君君忍噫魚書一紙動經年爭遣  
君行不留滯君如枝上花隨風飄泊天之涯妾如陵上

樹歲寒霜雪長如故高樓望遠山蒼蒼夏日不暮冬宵  
長望君君不知引領情獨傷可憐綠鬢飛蓬亂只有相  
思敢相怨相思相怨且莫論問君何日重相見

初冬寓居下昂村寄鑄范

幾日新寒劇音書苦未通文名皇甫湜酒伴斛斯融時  
易涼暄變身緣著述窮臨風無限意極目送飛鴻

有感次鑄范韻

此情如奪鳳皇池什襲膺囊閱歲時燕石深藏徒自寶  
鴻毛輕擲不須疑更難門戶追全盛只有文章解起衰  
米老蟾蜍還好在傷心也合淚頻垂

登小梁山小坐永慶菴僧舍

山在下昂村  
東北三里



野步不知遠聊舒腰腳頑坡陀皆種竹嵒嶺亦名山落  
葉禪居靜嘗茶客思閒塵勞欣暫息日暮欲忘還

初冬雜感三十首

逝水年華去不窮奔馳烏兔倏西東千秋詩壘憑才奪  
百雉愁城讓酒攻落葉空悲如此樹蠹書應號可憐蟲  
閉門聊學陳無已亭角徘徊滿袖風

一試鉛刀未及鋒書生只合困章逢驂騑不券兼金骨  
蟣蝨能披寸鍤胸遲暮獨憐霜後菊孤標自有歲寒松  
憑誰鑄作橫腰器躍冶干將正在鎔

底事羈留向此邦輕帆未得整歸轡素書欲寄遲來雁  
俗客能驅賴叟龙外謬何堪嗟鑄錯傾危難免駭緣橦

旅居岑寂誰相慰遠寺疏鐘到夜窗

寂寂令人歎伏雌持身原未習夸毗阮孚只癖登山屐  
伍員猶吹乞食篋無俚幽憂憐此日相貽冥報定何時  
還應說鬼同坡老姑妄言之妄聽之

枵觸無端涕欲揮豪華往事已全非買花舊費中人賦  
翦葉新裁上古衣藥店早嗟龍出骨文壇空炫雉飛翬  
傳家只賸青瑣在敢共張何較瘦肥

但守廉貞漫卜居苑枯何必藉吹噓準元後世期君實  
獻賦當時陋子虛夢蝶不妨齊物論飛蛺曾有絕交書  
萌芽便作干霄想未肯薪材比散樗

不知身世有窮途節序寒暄轉瞬殊變化久隨君子鶴

淒涼誰問丈人烏名垂竹帛猶馳繆利逐錐刀竟謚愚  
記否孔賓窗下語較量山岳與毛銖

破屋三椽傍小溪欠伸渾訝打頭低七絃中絕琴爲枕  
兩面斜磨墨似圭獨醉免遭官長罵多聞應與古人稽  
青熒燈火真佳趣窟室何妨類蟄棲

幾曾放浪外形骸落落襟期已寡諧自覺安心殊不惡  
誰能遇事輒云佳抑揚盡付潛夫論興替難侵達士懷  
多謝寒蛩知伴我宵深唧唧繞空階

撫事端宜咏七哀前塵回首盡浮埃從來白社居名士  
豈有紅爐鑄橫財呵壁問天原幻想抽刀斫地信奇才  
近來學得忘機法海畔飛鯖不用猜

空負男兒八尺身誰云席上重儒珍人能好學斯爲福  
家有藏書未是貧詩只七言堪辟瘧錢非十萬不通神  
若將得喪論高下抱膝衡茅乃幸民

好是無窮泯見聞從他萬事日紛紛浮名偶哂麒麟植  
綺念全消蛺蝶裙牘有叢書門兩版未能築室水三分  
根塵縱道捐除盡如草新愁不可耘

聊可栖遲避眾喧心旌忽似轉風旛文章有道先除俗  
功德無成漫立言陳迹乍看牛繞磨殊榮卻笑鶴乘軒  
如何高隱箕山客古樹懸瓢尙苦煩

澁雨酸風釀薄寒端居遣日仗鉛丹入榛義忽童烏悟  
埽葉訛先帝虎刊三益欲尋同調少一癡想借異書難

何年好賃琅嬛地七略編排取次看

博簿讒書盡未嫺儒生事業只名山周妻何肉難成佛  
老帶莊襟自得閒把瑣寡傳邀月飲應門無僕倩風關  
輸他謫宦蠻荒去鄰火村春有往還

負郭曾耕數稜田秋成徒爲盼豐年救飢敢上三千牘  
應賞慚無百兩篇色喜未膺毛義檄謀疏空贈繞朝鞭  
學儒猶道治生急鐘鼎山林問孰賢

塊獨空齋夜寂寥蕭騷庭樹振寒飈如聞天籟兼人籟  
更雜江湖共海潮柯葉經時終不改萍蓬異地益無聊  
支頤細數更籌徧燭影幢幢燼易消

瓦釜黃鍾太溷淆浮沈身世劇懸匏閒情賦恐微瑕指

遠志名徒小草嘲漫詡三壬宜好爵何來六甲作行庖  
幽窗飯罷渾無事擘紙聊將尤序鈔

勿爲離憂續楚騷飢寒大好鑄賢豪家無長物餘殘帙  
筆不中書盡禿毫顧我訓恩留一劍從人占夢說三刀  
徒將畫繡誇鄉里駟馬高車定枉叨

竹几繩床足嘯歌居然安樂此行窩盟尋茅舍唯鷗鷺  
陣列楸枰亦鸛鵲豈不懷歸留滯易未能免俗別離多  
山肩斜聳真堪笑欲遣詩魔敵睡魔

荒村市遠靜無譁石鉞閒烹顧渚茶神祝趾離祛噩夢  
香通鼻觀對名花可充奴婢應收橘便是公侯也種瓜  
記取雪泥鴻爪印浮生小住卽爲家

紛紛微逐少年場十丈紅塵有底忙獨處自嗟形問影  
狂談今悟厲憐王游仙妄想凌牛斗作事難成遇角張  
貰醉勿輕裘馬換人生酒債不尋常

始信才難與命爭終虞績學未專精豈無雞犬升仙籍  
安用詩書記鬼名淮海陳登豪氣在乾坤杜甫腐儒輕  
翻教眉舞西銘語庸是天公玉汝成

懶向蕒茅更乞靈幾番開落數階萸羈遲況味雲辭岫  
清冷襟懷水在瓶荒荻有情頭早白遙山無恨眼常青  
宵來歸夢知非遠只五長亭五短亭

學書學劍記吾曾過眼升沈淚滿膺冀野空羣誇相馬  
齊諧志怪說搏鵬先生敢道談何易公子猶嫌病未能

只有崔儵五千卷榜門或恐不堪矜

倘念平生馬少游孤亭也合署三休縱饒口辨非齊贅  
忽訝身羈似楚囚避俗人偏甘小病著書天特與窮愁  
眞疑微末同螻螳海外傳聞更九州

世味從今閱歷深未空憂患費沈吟交親久隔樽前話  
模範應師座右箴四海知名懷鑿齒一篇難墨問無心  
爽砧繁杵千何事能使離人感不禁

典墳陳篋恣沈酣千載云遙可接談求是齊竽吹一一  
得朋蔣徑闢三三禪機捷偶爭初地世路危眞怯左擔  
若士盧敖今在否醯雞局促果何堪

卻笑蕪詞筆屢拈漫居高價索酬緜登場傀儡機徒巧



撼樹蚍蜉種未殲人意漸如天意冷文心難與道心兼  
會須刊落閒枝葉盡把箏琶俗耳砭

由來嗜好異酸醎蘭蕙當門恐被芟魯兩生應嗤泥古  
齊三士亦苦遭讒低徊前事心如擣落拓中年志不凡  
歲月無情歸計阻逡巡飛雪滿征衫

寄心如

杯水文章賤衡茅姓字輕豈惟詩酒契奚啻弟兄情貧  
久能安命才高不爲名雲龍擬追逐蹤跡苦難并

以詩代書介心如與李秋紉

善蘭

結交二首

我友賀那子

心如自號也

時聞說項斯高懷真氣骨健筆古

文辭君亦相知否吾曾夢見之欲從詹尹問握手定何

期

絕學天元一知君探索精廉隅通少廣正負借方程展  
卷疑思問懸鐘叩則鳴不須傾蓋語魚雁證斯盟

愈愚惠題拙稿次韻答之

論才難與古人同續學應師長者風敢冀留名三不朽  
眞除搜句百無功溫柔深旨宜微會月露浮詞待埽空  
畫出龍眠白描法從他塗續炫青紅

玉鑑堂詩集卷三

玉鑑堂詩集卷四

烏程汪日楨著

同邑後學劉承幹編次

贈袁子瑜

修璋

次韵

身世茫茫百慮牽，書研珞琤理難詮。  
戎機神速兵猶火，君方從宦跡浮沈命在天。  
名想豹皮留汗簡，事嗟馬腹軍乍滿。  
困長鞭重傾十七年，離緒回首前塵感逝川。

感遇詩篇鎮畫灰，如春鳴鳥夏鳴雷。  
難醒噩夢心猶怯，未了吟逋客屢催。  
風馭疾馳寒暑短，雪簷低壓壞雲頽。  
只宜相對招歡伯，日飲無何醉幾回。

酬董鑄范

蠡舟

疊前韵

駛車遮莫乞兒牽，自守元亭第一詮。  
拔劍哀歌宜斫地，

懸河俊辯且談天  
臂騰身世蒙頭睡  
困悴心情袒背鞭  
王後盧前渾細事  
較量未敢學盈川

狂瀾難辦止蘆灰  
五岳填胸鬱怒雷  
心緒吾還冰檠戰  
鬢華君漸雪霜催  
文章當世知音少  
絲竹中年壯志頹  
埽淨浮詞研樸學  
相期力障百川回

貽孫愈愚

變

三疊前韵

劬德難蕪俗不牽  
言從楚些得良詮  
十年還往師非友  
六鑿祛除性是天  
撰杖人多顏氏寢  
趨庭子或伯俞鞭  
底須卻病求靈藥  
抱朴書城問稚川

一瓣心香念未灰  
敢將布鼓敵雄雷  
笑談但覺鬢眉古  
箸述渾忘歲月催  
老吏文章同獄斷  
醇儒風概挽波頽

造廬莫厭過從數磨螳周旋往復回

四疊前韵索子瑜鑄范和

名繯利鎖謝拘牽風雅遺音義待詮金石奇聲矜擲地  
笙鏞廣樂聽鈞天一心組織千絲網四座傳觀七寶鞭  
競秀騷壇誇二子笑予學海不成川

石鼎宵深火盡灰彌明倚壁息如雷誰知翰墨供吟諷  
更勝錢刀苦督催鱗甲敢談龍變化崔嵬空歎馬虺頽  
降旛便欲從君請文陣雄師卻敵回

神

聰明正直有常經黍稷何如薦德馨嶽瀆功施宜黻冕  
星辰名氏誤丹青窮荒漫立金人祀流俗爭祈土偶靈

一笑淫祠多詔黷敢將賄賂到幽冥

仙

句漏應嗤葛稚川燒丹鍊汞事誰傳  
儒流偶信參同契幻迹空矜錄異編  
豈有松芝能駐景由來雞犬亦昇天  
誠哉記夢昌黎語護短憑愚未聖賢

鬼

柳車好送莫遲遲  
燐火青熒夜靜時  
異事曾還秦帝璧  
雅懷慣唱鮑家詩  
若爲圖畫工偏易  
偶作揶揄理亦宜  
一任黎邱多變幻  
不聞不見我何知

怪

楚些齊諧妄聽之  
求端詢末意何癡  
聖人不語時偏好

後世能知我弗爲牛鬼蛇神多譎詭瓦礫竹帚亦靈奇  
窮形盡相難藏匿總在燃犀一照時

知否

知否瑕多不掩瑜底須得失較錙銖晉人紀載幾乎罵  
魯史文章失也誕論古最宜平意氣探源直欲盡根株  
黃金擲牝真何益後世揚雲定有無

歲暮偶成

索莫殘年況杯醪且一中寒因風助虐人與歲俱窮薄  
俗交情賤清門世業空此身眞寂寂難免笑王融

題蔣生沐

光煦

審山紀游圖

景轉橋邊放棹宜尋山終竟爲尋詩莊襟老帶無多客

白塔紅亭倒好嬉路近只攜雙屐去我來可惜四年遲  
何當更鼓登臨興重倩孤雲寫色絲

題戴銅士詩集四十二韵

歲月忽不居學問互相長離襟四句隔夢境百回想寄  
言荷存問雅什快欣賞慰藉心旌懸醫治舌本彊平生  
事編刻古昔勤鑽仰風騷討源委得失斟銖兩有揮灑  
性靈有發抒學養有藻采紛葩有波瀾激盪節然嵩華  
高浩然江海廣冥然運鯨鵬闖然掣虬蟒夔石鏘然鳴  
娥輪皎然朗瀏瀏然而清颯颯然以爽奧窅窮探研衣  
冠鄙規倣世競炫浮華君獨餐瀼沆揆諸志所之庶已  
得其髣淨境埽塵埃平蹊闢夷昶六鈞力士弓一品仙



人竈嘈呌鐘兩樂纈栗車重輞氣逸鳥刷翎味腴熊舐  
掌字字擅神奇時時溯疇曩貧宜倣骨撐才許香名享  
三男盡騏驥萬里絕羈鞅英詞絢輦悅美譽蜚縹緲史  
能識撐犁字早辨甄益碩腹弄縹緲良材敷篠簜藍田  
失雙璧岱岳嗟一往仲子劬夏課壯歲登秋榜公車赴  
紫陌旅櫬隔黃壤盈虧理難測珞琤言眞迂孤孫戲篠  
驂高堂扶鳩杖事育兩艱難情懷一悽惘推天慰孟郊  
談元淩郭象噩夢劇辛酸清思何泱泱逍遙物外游蕩  
滌人間響伊余苦凡劣少小蒙推獎結交廁紀羣埶庸  
陋凡蔣謂當有志成而竟不思罔他山攻錯資異地音  
書枉文囿翹蘭蕙視田薤榛莽懷探五色筆手結千絲

網抉擇目已迷獻替論終譴再拜陳此詞千秋示吾黨

珊媛曲

石氏女名珊媛寧波妓也道光二十年夏嫁爲  
營卒崔某婦月餘崔隨征定海是年九月崔戰  
歿珊媛誓不更適其假母迫使復理故業媛佯  
諾焉夜潛起赴甬江死士人憐而葬之年僅十

七

四明江水清難睡珊媛生小芳名播墮落空懷藩溷愁  
妝成翻苦鉛黃浣翠袖輕籠怯捧觴黛眉微蹙羞陪座  
倚竹低徊態可憐破瓜綽約年纔過骯髒風塵不自聊  
舞衫歌扇一時拋指迷幸渡青蓮筏譜曲誰賡碧玉簫

嫁得軍中射鵰手粗衣糲食甘長守健臂彎弓一笑時  
神針綻甲三更後比目真成得水魚纖腰不關迎風柳  
俄驚羣醜擾邊垂敵愾旋興六月師袞袞王侯本無種  
依依兒女不須悲別離可奈軍書急忼慨休論戰事危  
揮手橫刀出門去淒涼轉瞬卽天涯一自鴛鴦嗟獨宿  
綠鬢飛蓬罷膏沐破鏡難憑隱語猜金釵屢把歸期卜  
自惜驚鴻風貌殊願同臥虎功名速是時戰艦列旌旂  
海上戈鋌大合圍馳驟陣雲轟礮火模糊創血裹戎衣  
鯨鯢波浪軒然起猿鶴蟲沙伏以飛化石尙勞山頂望  
招魂只向夢中歸夢中忽訝郎君到交集悲懽相慰勞  
誤喜今番奏凱歌誰知詰旦傳凶耗髻髻羣憐魯婦悲

三  
髣髴願學其姜悼假母相依晝掩關酸風瑟瑟淚潸潸  
平將燕子樓中女錯認潯陽江口船有酒強呼調鳳軫  
贈釵促使整雅鬟沈憂苦恨埋無地薄命生拚殉所天  
死生雖易心難改倡隨卅月恩情在不堪火宅再棲身  
忍見金夫更遷賄欲疏防範且佯懽竊恐遲疑貽後悔  
蒙面羞爲辱井逃湛身自滌情瀾挽茫茫何處覓郎尸  
好逐江流歸大海一擲清泠杳不還九原冥漠勞相待  
玉碎珠沈一水隈傷心紅粉早成灰路人太息爭相問  
姓氏流傳石與崔蛺蝶春風羅綺化杜鵑夜月佩環來  
一抔黃土佳人冢十丈青松寡婦臺記取埋香憑弔處  
江花江草有餘哀

蛛網十六韵

爾本微蟲質誰將絕技傳巧同蠶吐納勞勝蠃盤旋結  
撰迴文錦周圍列宿躔腹摹牛鼎鉅背負蠚筐圓舒卷  
原由已循環且任大千絲條理備一綆往來緣柔喜風  
難斷疏知日可穿自能規矩中不畏網羅牽宵小除蠅  
蚋貪殘笑螭蜥飽應餬口易高覺置身便綬罟漁梁設  
罟愚綺戶懸聖王曾倣倣隱士偶矜憐八陣軍容肅三  
輪佛諦宣漸成功有序居正位無偏組織文章手經綸  
宰相權何時看展布晝暖畫堂前

伍子胥簫

簫聲幽咽隨悲風子胥乞食吳市中殘杯冷炙不自屑

哀笳怨笛將無同嗚呼侏儒飽欲死惘惘飢驅乃奇士  
君不見漂母哀王孫野人給公子不須尺八譜哀音今  
古英雄盡如此

高漸離筑

擊筑易水邊悲哉壯士不復還擊筑秦宮裏惜哉祖龍  
終不歿荆卿銅柱留侯副車成敗由來有天命一擲不  
中謀非疏君不見漢高皇顛羸蹶項歸故鄉浩歌擊筑  
雲飛揚

禰正平鼓

不報嚴城漏不催上苑花岑牟單綬作鼓吏淵淵金石  
漁陽撾卓立當筵自袒裼鳴鼓而攻坎其擊手如白雨

點頭若青山峰公將辱我我乃辱公老瞞大笑不敢怒  
禍生禍生人中龍

王摩詰琵琶

紫檀槽黃金撥一曲鬱輪袍能令白雲遏簡兮簡兮不  
自嗟殊榮博得簪宮花鴟絃鳳柱才人手繡戶珠簾貴  
主家吁嗟乎丈夫磊落甘貧賤君王側席明光殿抱月  
懷風羞自薦

嚴節婦詩

節婦陳丙女嚴維鶴妻希涑母烏程人

泰山之竹孤生寒寒聲謾謾吟離鸞有子可鞠田足食  
吁嗟尺宅生春難無波古井洪爐玉蔗境一朝迴黍谷  
鸞雛生子竹生孫旌閭詔下蒙褒錄完貞白首歸去

來相逢地下歡顏開嵯峨高冢道峰麓一抔土卽懷清  
臺君不見慈竹有筠堅莫比舞鸞有鏡清于水汗筠作  
史鏡千秋陳女嚴妻題姓氏

王臺叔

棠

輓詩

斷鴻天末送哀音一紙飛書淚滿襟姓字宜登高士傳  
畫圖空寫故交心

秀水陶梅若爲作客窗哭友圖

乞靈大藥成虛願多

病餘生尙苦吟愁絕對牀聽雨客總帷影裏慟人琴

相逢杯酒苦慙慙聯襟分襟一夕中回首恍如前日事  
論心綽有古人風文章傳世名長在哀樂傷懷疾始攻  
才富不教年竝富乘除誰與問元功

哭沈柳橋

登瀛

四首



岱岳悲長往鄉邦失所宗斯人宜不朽此涕豈無從噩  
夢驚先兆沈疴減舊容外生何限感相杵罷鄰春

步武鄉先輩淵源古鉅儒周親通粟帛外友託妻孥身  
世嗟筴鳳人情愛屋烏淒涼思舊賦撫臆淚沾襦

志切爲時用覃研乙部書典章精攷覈目錄富收儲推  
廣叢亭議刊除夾漈疏鴻名垂竹帛此願惜成虛

十載苔岑契忘年意倍親借書讐校便問字往來頻學  
邁劉原父齡齊郭景純待將無媿筆表墓勒貞珉

過溫鍊花

日鑑

拾香草堂看梅因留小飲卽事有

作

路近過從便敲扉犯曉寒庭梅春意足杯酒故人歡揖

讓苛儀簡文章定本難時方編次大集黃墟今昔感回首涕洟

瀾謂沈柳橋去春同集於此

壽孫愈愚變六十

太古遺風物外身閒扶鳩杖岸烏巾筆端早注千秋遠  
胸次能完一味真玉面方瞳無量壽儒林文苑必傳人

良期攬揆符佳讖更祝華年過老申君生於八月五日按癸辛雜識汴梁

相國寺有石刻東坡題名云蘇子瞻子由孫子發秦少游同來觀晉卿墨竹申先生亦來元祐三年八月五日

老申年一百一歲

廿載棲遲共里閭人倫藻鑑屬鄉評但除文字全祛累

自嗇精神善養生北面甘爲牀下拜南飛新倚笛中聲

華堂介壽簪裾集丹桂飄香撲酒觥

八月十四日愈愚招同人集飲修竹山館用韓退  
之八月十五夜贈張功曹韵賦謝

童齡耄歲觀恆河西飛鳥免東流波一生幾遇好風月  
最宜對酒同酣歌小極無端忽見苦困臥匡牀聽愁雨  
平生意氣秋雲高閉門乃學寒蟲號知君招我文字飲  
病魔聞命皆潛逃書生饕餮屬饜易嘉肴清酒除羶臊  
主賓一室七人共頗勝二客從臨臯先生角巾如錦里  
貞疾天教恆不舛即用君六十自述詩句靈丹何必求大還耆年  
碩德與古班幸參末坐荷教誨不遺微賤歌縣蠻清談  
妙詠盡餘事學識已覺超人間達觀善作娛老計魯戈  
揮日能留攀酒闌歡極臚詩歌願君從此設定科一年

一醉豈云多斯盟永永期無他造物雖駛如吾何

小滄浪唱和詩題詞計二田

光祿

屬賦用歐陽永

叔滄浪亭韵

計君二田老詞客寄我唱和新詩篇烏絲寫定兩大冊  
丹黃甲乙何紛然我聞聞湖好風景雲林迴繞溪灣環  
林溪幽絕亭榭穩濯纓之水清而妍此邦碩彥相輩出  
其人已往聲名喧殘縑零紙六丁守常恐散落成雲煙  
爾來古意君復嗣前生翰墨留因緣春秋佳日文酒會  
一時朋好皆詩仙長篇短幅盡圓美如啗石蜜甘中邊  
高人正爾發高唱田歌誰道非知田覃思轉若不經意  
風行水上生淪漣會看雒誦徧吳越傳鈔坐費傭書錢

吾生少小有吟癖寒蟲酸咽嗟誰憐浮名不及一杯酒  
醉中或可全其天名賓實主要在我東隅已失思虞淵  
君苗筆硯久焚棄無何日飲惟酣眠今朝見獵忽心喜  
依然好尚追當年書生結習君莫笑嚴詩杜集千秋傳  
題蠶事圖十首次韵

烏兒

宛如破殼出鵝兒戢戢駢頭劣一絲剛好桑枝漸濃綠  
滿窗紅日影參差

出火

三眠出火費綢繆酒醴虔恭祀馬頭更取權衡較多寡  
穰穰絲繡祝盈篝

大眠

出糴纔過飼食時大眠新起莫稽遲  
桑柔采得連枝葉入手青青曉露滋

花蠶

秋兒秋母盡堪珍別有花蠶種更新  
豈獨文章輝五色請看他日布經綸

繚孃

九還丹就幾經綸蛹伏蛾飛轉眼更  
檢取繚孃先上簇蘆簾稻帚縛山棚

上山

勤勞小息一開顏準備溫爐好灼山  
又道灼山宜看火

催人啼鳥正關關

翦花

羨他化蛹尙成雙  
翦出花枝意早降  
待繡鳳鞋新樣好  
香絨細擘傍紗窗

對蛾

辨別雄雌對兩蛾  
熏爐明燭夜如何  
虎交雉雊關時令  
更有微蟲候不訛

生種

阿蛾迴轉祝團團  
試攷蠶書一卷攤  
息息生機總無盡  
來年忙月待重看

題董樂閒丈

聚  
破帆圖

我觀破帆圖試作破帆行破帆有佳處請君爲我傾耳  
聽風急舟不駛風狂人不驚從來設想貴退步人生快  
意安足憑君不見江湖連天波浪生中流一葉嗟敝傾  
收帆遲挂帆早風力吹帆帆力飽履險乘危常草草安  
穩何如破帆好風順不可常帆破猶可張但使風常順  
破帆亦何恨

楓橋顏子祠十六韵

俎豆三吳地簞瓢一畝宮題顏荷宸藻卜宅對江楓像  
設承前代階封本上公四科名獨冠六藝學先通禮樂  
推王佐行藏協聖功宣尼心特契神禹道相同子姓雲  
祔後鄉關泰岱東因隨南渡馬宛作北來鵠數典難忘



祖傳家尙屢空金縉頌內帑土木聚羣工白練當年望  
朱甍此日崇取新遺址改稽古聖朝隆祝史衣冠肅祠  
田黍稷豐蒸嘗陳魯酒弦誦式吳蒙故國依虞仲虛名  
笑孔融從來豪傑士陋巷有儒風

楓橋寓居雜詩三首

草莽池臺劇可哀金閭門外一徘徊江楓識我如相笑  
此客今來已十回

旅夢驚回睡不濃布衾可戀起來慵殘鐙未滅窗猶黑  
臥聽寒山寺裏鐘

朔風庭樹鎮颼颼就曝南榮擁敝裘寄語漁洋應一笑  
眞看白日淡蘇州

吳江道中

歸櫂松陵路瀟瀟寒雨中舟輕難敵浪裘敝不禁風泛宅元真子纏衾鉢朴翁後來徵故事我亦過垂虹

除夕卽事

寂寂真何待流光去不同劬書生計拙說劍壯心頽聊擊催詩鉢難尋避債臺三冬寒氣索旦晚好春來

題月冷峰青圖

上海趙霞莊

維嘉

余從表兄也以府經歷赴廣

西候補卒於漢陽舟次其姬人李二姐京師人

吞金以殉霞莊族弟右卿

光弼

爲作此圖屬題

青峰倒景湘江水冷月愁雲淒滿紙讀畫令人感無已

貞烈羣欽弱女子郎名維嘉乃趙氏家住江南客燕市  
妾曰二姐其姓李生小單寒美容止十五來歸奉盤匱  
郎君捧檄爲貧仕攜家道出湘江疾病疾沈綿竟不起  
妾心如金堅莫比感君恩義從君死時在道光十一祀  
二姐年纔十九耳湘江之水清且泚鬱鬱芳馨動蘭芷  
峰青月冷長如此億萬千年此詩史

與王仲漁 錫琛 夜話二首

拔劍悲歌感百端較量身世太辛酸愁懷隘視三千界  
別夢遙連十八灘 時令兄崑圖鼎鼎中年哀樂易茫茫  
大地去留難分明杜老題詩處秉燭羌村語夜闌  
壯志銷磨困米鹽讀書謀食兩難兼未能莊安藏刀喻

大似揚童荷戟占萬事由來如意少一生自信擇交嚴  
我歌君和真同調呵凍臨池筆更拈

閱戴銅士銘金戊戌年日記誌感二首

記否同游處蘇州又秀州華年春易老往事水長流是  
想纔成夢無方可療愁紀行存筆札此樂苦難留  
更把當年事從頭數一巡煙波春泛艇燈火夜留賓結  
習餘文字歡衷阨賤貧回思如昨日六載感飈塵

馬

伏櫪年年壯志銷千金駿骨枉相招空留拂絹將軍筆  
難伴鳴騶使者輶安步底須爭徑捷長驅不敢怨途遙  
平生慣識鹽車苦玉勒金羈未肯驕

牛

犧牲幸免滌牢中銀漢仙槎路莫通問喘停車思宰相  
讀書挂角歎英雄回頭自有排山力燒尾能爭破壘功  
太息商歌聲歇絕一枝短笛伴村童

羊

長林豐草任盤桓羸角誰知進退難綠野開莊容點綴  
冰天仗節共飢寒迴腸道路肱三折熟胛光陰指一彈  
奴隸猩毫臣免穎五車身後壓文壇

豕

圉豢牢囚亦太愚幽風誰寫獻豳圖心傷人彘刑章酷  
耳熟如豨樂府呼難免就烹歸鼎俎竟甘自辱負泥塗

西  
憐他饜飫糟糠味博得脂膏待翦屠

犬

偶聞怪事說歌梅飽食狺狺日幾回  
逐兔有時隨獵騎  
化龍爲我守書堆  
心知衛主忠臣節  
力足當關大將才  
舐鼎便登仙籍去  
吠聲吠影漫疑猜

雞

雄冠銛距太昂昂  
野鷺同羣氣不揚  
擇粒未妨廉士節  
注金或鬪少年場  
一官小邑絃歌美  
五夜荒村起舞忙  
風雨瀟瀟愁寂處  
幽窗伴我話淒涼

哭王氏佩兮二妹

曰琛

二首

斷雁傳素書  
哀音淒滿紙  
展書不能讀  
淚下如鉛水  
初

予來問疾不謂汝將死就使難速痊參苓猶足恃別來  
十餘日哀哉竟不起問年得幾何二十九而已兒女幼  
無知夫壻隔千里汝魂果何歸汝目恐猶視

昔汝在閨中常得父母憐昆弟姊妹多惟汝稱最賢少  
予只三歲兒嬉共庭前就塾誦詩書昕夕同一編既嫁  
宜家室于今纔十年翁姑所鍾愛婦職允無愆奈何年  
命促一旦歸黃泉欲寄大雷書茫茫此蒼天

寄王崑圃妹壻

錫珍

贛州

我昔客杭州吾婦病而死君今客贛州吾妹疾不起此  
味我慣嘗君今亦如此想見開書日一慟不能已邁歸  
定何時修途幾千里一女生三旬四子各幼稚對此摧

心肝哀哀失所恃  
吾聞擊缶歌前哲  
寓微旨念君重自  
念淚流面如洗  
丈夫有時命凌雜  
不足理相期早致身  
俯仰拾青紫  
上博庭闈歡  
下令泉臺喜  
善保千金軀  
自愛宜自慰  
慎勿效神傷  
區區爲妻子

同人分詠閨中用物余得二題

熨斗

爲郎伸帛摺細意替經營  
可惜眉閒皺難將熨貼平

剪刀

大好并州刀裁衣稱長短  
別淚似連絲欲翦不能斷

寒窗雜興三首

最苦風餐雪虐時  
半瓶白酒好禁持  
幾竿壓折窗前竹



我自瞢騰醉不知

夢到西冷處士家空吟對雪憶梅花居然羣玉山頭住  
不見仙人萼綠華

凜凜寒威歲欲除薑芽斂手正愁予朝來腹橐多新句  
硯水成冰不得書

### 古風

麒麟牛作植橐駝馬腫背虛名無實用少見必多怪彼  
哉石季倫自詡身名泰一朝忽見收軀命付奴輩吁嗟  
嵇叔夜放浪形骸外奇意鬱青霞鸞翮亦遭鍛貧賤難  
自存富貴有時敗自處無一可浮生果何賴吾愛陶淵  
明恥向督郵拜吾愛申屠蟠不受黨錮害

陸簫士

長春

話去年西湖舊游感賦

一洗胸中萬古愁西湖風景最宜秋舊游回首渾如夢  
衰柳殘荷水磨頭

風逼襴衫分外涼隨人幾度踏槐黃湖光山色都相笑  
如此襟懷未減狂

一雙蠟屐快同攜行徧蘇隄更白隄游興未闌人盡散  
畫船簫鼓夕陽西

葛嶺題詩興太慳空吟雲占半房山輸他玉峽飛龍句

五字流傳亦等閒

余與簫士自到西湖卽援東坡入廬山故事相戒不作詩及登葛嶺忽擬

題壁而余僅得雲占半房山一句竟未成篇

秋土秋山有夙期冶游渾不異春時踏歌聲裏歸來晚

拍手爭看倒接羅

帶郭依山穩結廬故園無此好家居何時卜築同招隱  
兩板柴門萬卷書

雨

一洗驕陽酷雷車殷殷過濕雲爭擁樹急雨亂翻荷得  
酒應歡喜當風且嘯歌北窗容醉臥消受晚涼多

酬宋樗里樵次韵

龐眉屏跡海東濱翕集聲香溢齒芬有豹深藏方隱霧  
與龍追逐願爲雲書倉珍祕靈蘭室詩律精嚴細柳軍  
他日幅巾來問字忘年應許結同羣

漫成

太息娉修轉絡羈欲將行止問神蓍苗山松澗天何意  
鳥鳳魚鯢世不知憂患未空宜學易勸懲無當莫言詩  
如聞孝若詞鋒俊隱几從容抵客疑

題海棠待聘圖

嫁杏娘梅候漸殊良時嫵婉莫輕孤碧雞走馬來諧價  
不惜平量十斛珠

風情誰似放翁顛幽獨名花黯自憐銀燭高燒開夜宴  
酒缸也合買紅纏

咫尺紅牆隔渺茫可能三萬聘錢償錦官城外花如錦  
卻笑天孫組織忙

蹇修好爲結同心判白裁紅伴苦吟金屋深藏勤護惜

綠章日日乞春陰

坐雨遣懷

癡雲淅淅雨絲絲  
釀作春愁黯自知  
茅屋有人浮白賞  
芒鞋誤我踏青期  
波添野渚蛙鳴早  
風阻郵程燕到遲  
悔質敝裘償酒債  
峭寒如水苦禁持

初秋寄懷范白舫

錯

揚州卽用去秋見寄韵

一葉井梧落黯然  
秋思深路長  
惟有夢語苦不成  
吟涉世疏良策經年滯  
遠音何當騎鶴去  
邗上續題襟

家琪雲

鼎權

疑園志題詞二首

疑園者實無是園也  
但擬議而爲之  
其文奇恣不限繩尺  
蓋寓言別有寄託云

園池記外出新編意匠經營劇自然謝客早誇先作佛  
曹唐今賦小游仙心通上上乘中偈夢到非非想處天  
彈指華嚴樓閣見不須辛苦費言詮

廣廈平生志未酬妄言妄聽足埋憂奇文自得真三昧  
俊辯能知大九州鵬鷃逍遙同世界蜚鷗迴換幾春秋  
此中占盡神仙福乞與人人作臥游

### 舟行順風

如絃離柱矢離檠迅速征途快此行雲挾風威催雨落  
舟憑帆力與潮爭鷗鳬浪跡真無定象馬驚波太不平  
會得安心微妙法世間險阻盡夷庚

### 和于問樵

清二蘇齋落成二首次韻

溪山佳處築幽居消受吟餘更醉餘曲檻評花春霽後  
匡牀聽雨夜涼初二紅學煮齊安飯七白新栽甫里蔬  
領取詩篇禪悅味華嚴法界契眞如

憶昔三高此卜居風流儒雅古人餘夢清自比羲皇上  
詩好能追正始初萬个煙圍千畝竹九秋霜飽一畦蔬  
唱酬花萼編家集四海明儔總不如

題鈕山琴

蟠

臨野老屋圖二首

君書屋顏曰  
幽竹山窗

觚觚遺編在文章氣味眞北麻留故里南國數先民水  
竹居原好滄桑跡已陳草堂今再造後起有賢人  
憶昔苔岑契論心共醉哦高懷千載上小別十年多不  
盡停雲思相期泛月過山窗幽竹裏重與鬪陰何

九秋詩社與袁子瑜

修瑾

陸簫士

長春

分題每集

三題計十五集共四十五首

### 秋林

長松修竹總含愁  
翔鳳空聞故跡留  
十里涼煙蟬獨語  
一天返照鳥爭投  
白雲深處停車坐  
黃葉聲中曳杖游  
只有廣寒仙植好  
枝枝丹桂小山幽

### 秋店

逆旅西風看自悲  
亂山繞屋似松滋  
人稀警枕宵無寐  
月冷征途曉獨辭  
殘菊一籬聊貰醉  
荒苔半壁漫題詩  
茅簷坐聽雞聲唱  
彷彿匡牀起舞時

### 秋齋



蕭寺荒亭一例猜空山寒信早相催傲霜松菊曾開徑  
積雨琴書亦繡苔涼月滿窗新夢覺清風入坐故人來  
打頭屋小孤燈暗夜讀歐陽賦筆哀

秋容

明媚蒼嵐淨碧波淡妝濃抹態如何誰從玉露金風裏  
更唱瓊枝壁月歌雨洗芙蓉含淚濕霜欺楊柳織愁多  
不嫌瘦圃花憔悴日日籬邊載酒過

秋光

一片空明映太虛鯉魚風起雁來初經霜波碧清無底  
過雨山青畫不如籬落疏燈尋蟋蟀庭階涼影浸蟾蜍  
登臨病眼何曾怯擬挈萸尊策蹇驢

秋色

平澹功從絢爛深  
試參造化悟文心  
寥天風緊鴉翻墨  
老圃霜嚴菊散金  
涼月有情窺破牖  
夕陽無語畫疏林  
白蘋紅蓼汀洲路  
渲染清華入冷吟

秋帆

青蒲無恙挂輕航  
神助眞疑送馬當  
五兩潛吹疏雨歇  
一桅遙界碧雲涼  
江天日落鳥爭立  
海國潮迴鰲學張  
鬢點新霜心尙壯  
會看破浪走風樯

秋鐙

入隙商飈颯颯鳴  
釭花危碧飈深更  
案頭涼照蟬編展  
渡口疏搖蜨籀明  
四壁蛩聲尋欲徧  
半窗菊影畫難成

他年得意春風裏莫爲長檠棄短檠

秋屐

問菊尋萸好細論此生佳癖近黃門躡雲訪勝空山響  
冒雨行沽小市喧霜冷板橋留曉跡苔荒石磴印涼痕  
西風雙足登臨健青筋紅藤畫意存

秋興

豪情逸思兩難推遮莫商聲聽可哀蕭颯一毛潘岳感  
淋漓八首杜陵才預愁有吏催租到特恐無人送酒來  
領略冷吟閒醉味涼天鎮日好懷開

秋懷

吐絲相對罥青蟲觸緒纏綿恰與同萬里羈愁砧杵外

玉函  
一天涼思雨風中登山臨水人初別去雁來鴻信未通  
最是哀蟬蕭瑟處不堪心事付枯桐

秋病

憔悴西風似茂陵衿衣欲試弱難勝三山採藥吾將隱  
八月觀濤僕未能戰雨殘蕉身破碎淩霜瘦竹骨峻嶒  
鄮亭菊影人間有莫問涪翁幾折肱

秋戌

窮邊負羽歎勞勞醉臥沙場氣自豪望月涼吹猿臂笛  
挽波寒洗雁翎刀草枯關塞瑯弓勁日落旌旗畫角高  
夢裏還家驚易醒悲風四起正刁騷

秋穫

香催穠穉曉霜嚴農事西成問  
芻簷肩壓黃雲齊荷擔  
腰橫碧月各攜鎌家雞野鷺  
餘糧飽課雨占晴舊夢恬  
紅樹村邊風景好稻堆高過  
屋山尖

秋牧

商歌扣角動幽懷放犢山涯  
更水涯衰草霜枯芻秣足  
疏林雨暗笠蓑偕臨風弄笛  
歸將晚臥月和衣夢亦佳  
悟到養生鞭視後南華妙喻  
佐談諧

秋池

西風瑟瑟水溶溶倒寫羅雲  
鏡裏容疏雨一天凋菡萏  
清霜九月冷芙蓉流觴修禊  
春如夢洗研摹書意亦慵  
淨碧鬢眉涼影蘸荒園幾度  
駐吟筇

秋巷

賣花纔聽唱紅腔  
鷓鴣光陰駭急瀧  
一室簾飄風颯沓  
千家砧杵月琤琮  
登高載酒晨嘶馬  
歸路攜鐙夜吠龍  
愁絕烏衣橫夕照  
飛來如客燕雙雙

秋屏

水精雲母洗塵氛  
隔斷西風策汝勳  
菊枕低圍山六曲  
蘿窗斜掩月三分  
光寒銀燭宵無睡  
香冷金爐晚更熏  
絕愛已涼天氣好  
碧闌干外漾簾紋

秋角

霜寒警枕鎮無眠  
坐聽吹金更黯然  
悲壯龍愁鼉憤曲  
淒清鷹鷺馬肥天  
荒城晨鼓初嚴後  
蕭寺昏鐘未動前

淚灑黃州迎餞處西風哀響送坡仙

秋鐘

警宵一杵出精藍無射聲從令序參石罅寒波同歎坎  
枕函涼夢破沈酣霜清遠浦舟孤泊月冷深山徑獨探  
佛火青熒風雨黯蒲牢餘吼尙齧齧

秋鈴

月明南內曲曾教一片涼聲細碎敲梵塔霜高鐘磬寂  
畫簷宵冷雨風交清吟替戾知誰勝寒態郎當似我嘲  
卻憶羆劉邊氣肅凱歌遙聽奏金鐃

秋菽

宛如珪月正初三翠莢垂垂摘滿籃豉配蓴羹鄉味美

乳供齏饌腐儒甘中原露冷禾同熟小市霜清菜共擔  
更有碧珠方播種蛾眉留待伴春蠶

秋葉

渾疑二月放花枝點染西風畫裏詩泣露啼煙無限感  
迴黃轉綠不多時涼衫補綴從人翦小艇掀騰似爾危  
怪底枯桑憔悴甚吳都乃有八蠶絲

秋樹

倒頭危坐好攤書菌壓苔埋尙繞廬榆莢三霄差耐冷  
菩提半偈欲逃虛遙山楓影霜初醉小院桐陰雨正疏  
自有歲寒松柏在江潭搖落漫愁予

秋橘



神仙舊隱冷棋枰，慣聽淮南夜雨聲。  
水市人煙空外合，木奴風味個中評。  
霜團珠顆千林滿，日鑄金丸一點明。  
宵共北村矜夏熟，淩寒無媿伯夷清。

秋棗

八月幽詩好細論，風包日顥滿山村。  
簷牙香撲寒星落，籬角涼垂宿雨昏。  
北地佳人青鬢改，南朝宗老赤心存。  
安期信有長生術，飴蜜調甘更侑尊。

秋筍

此君俊味故依然，草迳林凋更發鞭。  
千畝煙雲龍化後，一籬風露雁來前。  
筵供賞月心先咒，籜解淩霜口欲涎。  
猶記殘春參玉版，重游應話木犀禪。

秋螢

涼宵幾點入疏簾  
幽火如星見復潛  
待月亭空團扇撲  
臨風人靜袷衣黏  
芸囊冷照三更永  
梧井微飄一葉兼  
莫向雷塘尋故苑  
於今衰草露痕霑

秋蚊

淨洗炎歊換袷衣  
軒窗豹腳尙紛飛  
網穿澹月蛛絲罥  
市闕輕雷蟻陣圍  
露坐針樓揮羽扇  
涼眠冰簟隔羅幃  
甘人膏血嗟何補  
丹鳥西風正苦飢

秋蠅

交繩飛止點輕衫  
露冷菅茅恨未芟  
破夢猶聞賢后警  
趨炎早罷佞人讒  
龍泉涼嘯驅仍集  
鱸膾香烹噉更饒

末路倘依騏驎尾風霜千里共飄飄

秋桐

朝陽曾集鳳皇馴更照如珪月半輪故苑碧雲涼入夢  
閒庭疏雨悄無人能知霜信先飛葉便是琴材也作薪  
鬢鬢班班元相感孫枝愁對苦吟身

秋桑

鷓鴣鳴鴛降總模糊空護柔條命野虞陌上嫩涼生白芒  
村邊斜日冷青榆眠鷺夢香三春歇馴雉情飛萬樹枯  
賸有六鰲曾策處童童若木在東隅

秋棉

茸茸軟毳擘鵝翎衣被功推草木靈一罅裂絨雲出岫

三棱垂朶雨淋鈴襟落玉露今番采枝發瓊華舊夢醒  
纖手碾彈偏耐冷空閨夜紡擁燈青

秋虹

□紅紺碧映霞標雨過寥空亘一條薄命佳人羅帶緩  
暮年烈士角弓弔彎環桂殿龍纏棟宛轉銀河鵲駕橋  
何處更容豪氣吐風霜天地正蕭蕭

秋雯

涼痕點綴碧玻璃草莽魚鱗幻莫稽星斗四垂疏雨散  
水天一色暮雲低遠開霽景銜紅日斜抹寥空界紫霓  
極目煙鴻霞鷺外登高客意總淒迷

秋嵐

冷翠千重繞髻鬟夕陽如在畫圖間薜蘿暝鎖雲中寺  
楓櫺涼浮雨後山紫靄四垂天澹沱蒼煙萬點石屏顏  
滿襟爽氣題詩處節近登高擬更攀

秋幃

蚊幃佳製翦冰紈垂處渾疑翠袖單坐久早怯三伏熱  
夢回先透一分寒清風有意來頻捲明月無心臥獨看  
艷絕流蘇圍錦繡凝霜紙帳笑儒酸

秋枕

藤牀筠簟共淒清一段幽香貯菊英夢境炎涼真頃刻  
夜情離合最分明遠蒙霜露思子美冷臥煙霞足此生  
欲挽文波供洗耳浮雲富貴久心輕

秋杵

荒臺舊夢冷凝霞閒伴琴囊與畫叉坐隱正宜楸作局  
游仙偶以橘爲家田疇劃畝黃雲盡星斗分躔碧落賒  
敲子聲中過夜半一簾涼雨落燈花

秋嘯

蘇門逸響尙遺留爽氣淩空散百憂煙沍幽篁人獨坐  
月臨寒戍客登樓林泉冷澹窮逾傲鸞鳳淒清遠更遒  
攜酒臺傾衰草滿長吟何處挹浮邱

秋農

硯作良田枉自矜先疇羨爾力能承澆蔬井汲寒泉列  
打稻場開爽氣澄暫著衣冠度報賽新完倉廩倍豐登

四鄰向夕閒談聚，入隙霜風黯一燈。

秋隱

鹿門煙月冷松杉，物外淒清迥不凡。  
叢桂留人枝偃蹇，空山落葉石巉岏。  
肯依熱客青油幕，自製涼天白苧衫。  
欲訪三高游衍地，霜風遙送五湖帆。

秋石

颯颯涼飈木落天，盆山更覺小窗妍。  
淩寒骨相鋒棱露，耐久心交信誓堅。  
霧雨冷埋魚腹陣，煙波穩泛鬱林船。  
如聞織女支機贈，便欲乘槎到日邊。

秋澗

一道山泉萬壑趨，清游九日采茱萸。  
登高吟侶扶筇涉，

向晚歸樵隔水呼涼浸雲缸波屈曲淡拖煙樹影模糊  
曹陽戰績今安在折戟沈沙失霸圖

秋砌

黃堆墜葉亂煙籠碧釦魚鱗夢早空苦雨一庭閒舞鶴  
寒風四壁絮吟蟲苔痕點鰲霜催冷菊影橫階月過中  
多少美人遲暮感斷腸花倚可憐紅